

佛說無極寶三昧經

西晉三藏法師竺法護譯



清刻龍藏佛說法變相圖

佛說無極寶三昧經卷上

才七

西晉三藏法師竺法護譯

聞如是一時佛在羅閱祇竹園中與千二百五十比丘俱菩薩九十億人皆如文殊師利等是時竹園四面周匝地自然生文陀般華種種妙色非世所有華華各有百萬之葉華上各各有佛坐之佛上各有交露寶蓋蓋間各有妓樂之聲一佛之前各有菩薩皆如文殊而坐問事竹園之地如三彌佛刹皆悉平等大千刹土日月之光皆悉蔽沒無復明耀百日之中恒見諸佛諸大泥犁皆得休息百鳥禽獸不飲不食皆得法味百日安寧見佛歡喜自忘畜心一切人民普得法味百日安隱無飲食想心意快然發無上意一切樹木皆有音聲竹園之中化有浴池池中生十萬

種華華有交露師子之座各有菩薩而處其上其邊各有天人立侍帳間各各萬種音樂千歲枯樹悉生華葉一切樹木皆傾相向竹園左右女人見佛者皆化作男子無復愛欲逮得法眼爾時佛作寶如來三昧遍悉感動無量佛刹四方四隅上下方面無極佛刹各遣菩薩贊持妙華來詣竹園禮事供養訖各却坐釋梵四王愛欲諸天各與眷屬於中以天華香妓樂供養諸大龍王阿須倫王迦樓羅真陀羅摩休勒等各各自與無數官屬來詣佛所禮事供養舍利弗白佛言今所感動是何瑞應佛言無應之應是其應也舍利弗言無應之應其義云何佛言汝往問於寶來菩薩則當爲汝演說此義即時舍利弗問寶來曰今此感動爲何瑞應寶來菩薩答舍利

弗羅漢疑重故未解乎有想想者非盡之法無想無作是爲法寶昔者我始發意之時與三十六億人求菩薩道時釋迦文亦在其中一切所志皆有起滅諸法本空譬如野馬無想起作持是作法而滅行求願想願欲得是自言得道起想罪根壞滅諸慧求於三尊想取泥洹疑盡滅身而生死不斷羅漢得泥洹譬如寐人其身才七在床一時休息命不離身羅漢得禪故是大疑寶來又問舍利弗言譬如龍王興作雲雨四面合冥不知所從來菩薩從第九已下悉已逮得六萬三昧其所興爲固不可限亦何復疑所從來處舍利弗言我學不得善知識故令我疑根不斷絕耳今聞尊法無所復益譬若如人爲百鳥作樂樂雖和妙鳥不聽受今我如是不了是法一切新

學菩薩大士聞是三昧德尊無量譬如夜時暫見火明火滅之後故冥無見令我如是無益已矣願作八千里火以身投中如是億劫然後乃出復入三惡道爲一切所散食數千億劫後生作人求善知識寧可不寶來答

曰火雖廣大心垢叵燒學無漚沲拘舍羅不得善知識者不得薩芸若也寶來菩薩白佛言諸法無主誰爲成薩芸若者誰成正覺弟子緣覺唯加大恩演示其義佛言善哉善哉所問深妙乃欲決斷生死之根今爲汝說諦聽受之若善男子善女人欲得阿耨多羅三藐三菩提當行九法寶一者見諸天無有處但有名耳二者見世間人民但有字耳三者見五道勤苦但有習耳四者地水火風亦本空耳五者當來過去現在如芭蕉無想六者

現生死無本際七者觀諸三昧寂無往來八者當觀大千諸佛刹土了無得三昧者九者見大千刹土中一切蠕動悉欲度之令與佛等是爲九寶得是無作之想者可得決斷一切大想寶來又問諸法無想當作何住得無所住佛言諸法無住住得爲想無起之念非想非道亦復是想斷求無想得住無住寶來又問當作何緣度於衆欲佛言衆欲無垢無度無主無往無來如虛空觀與泥洹等與無名等寶來菩薩言善哉善哉深妙乃爾般施菩薩白佛言菩薩欲得坐佛樹下莊嚴刹土教導十方令諸佛土如今竹園普使逮得令無所從生修行何法而得致此佛言當行八直一者直無名之響二者直無名之聲三者直觀十方佛土等無有二四者直見大千刹

法等無異五者直觀十方一切欲令與佛等
六者直於無形見一切無有起滅七者直見
入諸三昧無有往來相之想八者直見十方
諸佛般泥洹不般泥洹亦等無異是爲八法
菩薩從是疾得無所從生法忍教授十方得
如竹園寶來菩薩復白佛言今諸上人各從
遠來覩見世尊歡喜忘食乃得值聞是尊三
昧爲是宿福本願所致耶佛言亦非本願亦
不離本願所行常精進不失諸三昧常隨善
知識遠離於衆事寂然不數會但志在三昧
今故以寶珠來雨衆會上寶來復問新發意
菩薩欲行是三昧當云何行而得致是佛言
當行八法寶得是三昧一者即於佛前得是
三昧二者供養十方羅漢真人行菩薩法億
劫不懈一時聞是三昧尊法解說親近奉不

遠離三者供養舍利起塔彌滿植福無缺而
於法無益一時轉意作行者即向慧門四者
得四無畏於十方生死無所遠離五者菩薩
見五道勤苦意欲度之沒命救濟不以爲劇
又欲令彼得安至佛六者菩薩事人如奴事
大夫貴欲度之不以勤苦所以者何如本無
故七者菩薩親見九十六種外道於中覺知
欲起法住八者奉行六波羅蜜供養比丘僧
雖億萬劫不如一時聞是三昧十方其有當
作佛者用何爲證聞是三昧即知是人爲得
佛證也其有發意向是三昧歡喜信樂而解
慧者即爲已解六萬三昧是爲八法寶行是
三昧即得陀隣尼門佛於爾時欣然而笑光
耀煒燁靡不遍照文殊師利稽首白佛佛不
虛笑笑將有意佛語文殊審如所言是寶來

菩薩從寶如來佛剎來去是九億萬佛國其
剎名曰諸法自然其有善男子善女人往生
者不從胞胎不更苦痛無有恩愛皆於自然
華香中生即住立無乳哺者自然妓樂朝
暮娛樂寂然清淨以爲法僧若善男子善女
人聞是三昧即却六百四十萬劫之罪若命
終時便得往生彼國寶如來剎無日月光雖
有日月明蔽不現若人往生見日月星宿即
爲出現其見日月星有光明者即知是人當
往生也而諸聲聞不逮知此唯佛世尊及神
通菩薩乃見知之是故我今而笑之耳賢者
須菩提及舍利弗俱前稽首而白佛言願加
大恩加我威神得至彼剎諸法自然國禮事
供養須臾來還佛即聽往俱到彼國即至而
見其中所有俱亦復有羅閱祇城亦有竹園

釋迦文佛一切所有如此無異舍利弗問須
菩提恒薩阿竭隨我來乎須菩提舍利弗禮
事畢訖從彼來還至觀衆會續自如故佛問
舍利弗向至彼國皆何等見對曰我見彼國
悉如此間諸佛之功德甚尊甚尊僥哉會者
得遇見此也三彌菩薩從座起正衣服稽首
佛足願欲所問無生之法爲有想無未起之
想有識無泥洹寂然有定無泥曰不起有形
無設無形而在彼間教生死五道誰是主者
佛言諸法本無一切清淨因緣起滅故生諸
法以空造空本無是主三彌菩薩聞佛所說
諸天及人八萬六千皆得無所從生法忍昇
住空中去地百六十丈從上來下稽首佛足
是時三千大千剎土地大震動彌勒菩薩白
佛言向者地動是何瑞應佛告彌勒今地之

動非獨此也十方諸刹地亦普動諸刹亦復各有八萬六千天與人得無所從生住在空中皆如此也彌勒復問菩薩云何得致無所從生法忍佛言有六法得致之一者知天及人當得佛者未得剎者我當往剎之不與十方天下人共知之二者大千刹中若善男子善女人當得佛未得剎者我往剎之不與十方天下人共知之三者諸地獄中人當得佛者我悉當往剎之不與十方天下人共知之四者十方人絕命所生處我悉知之不與十方天下人共知之五者十方天人壽命盡我悉知之不與十方天下人共知之六者十方諸佛取泥洹不取泥洹我悉知之不與十方天下人共知之是爲六法疾得無所從生法忍彌勒菩薩白佛言是三昧者爲極大尊欲

令衆會普共逮得當行何法而令得之佛言當行九法一者視諸法悉清淨無邊二者視諸天亦清淨無邊三者視諸生死清淨無邊四者視五道悉清淨五者於欲無所求悉清淨六者視三界色悉清淨無有邊七者視泥洹悉清淨無有邊八者觀泥犁悉清淨無有邊九者見十方無有舉名者是爲九法菩薩行如是者疾得是三昧彌勒白佛言菩薩得六萬三昧三昧寧有邊幅無耶而得六萬三昧是爲無邊幅乎佛言雖得六萬三昧但有名耳不可極盡三昧悉具足又三昧者非但一品有無念三昧有離欲三昧有坐聽十方佛三昧有莊嚴諸佛國土華香自然來三昧有所說法一切人悉還本三昧有出諸法無還想三昧有說經時化爲百種音聲三昧有

說法億千萬佛國華香自然三昧有伏諸羣生三昧有發師子意獨行獨步三昧有所處莫不發阿耨多羅三耶三菩提三昧有所在處莫不供養三昧有亂風一起時如佛說經聲三昧有所向門莫不開三昧有所在處師子爲現三昧有飛到十方三昧有向門莫不開十方菩薩往來無極二昧有坐知十方人意三昧有壞滅諸想三昧有壞滅諸識三昧有合十方諸刹土合爲一刹三昧有發意不盡三昧有視三界了無一人三昧有住一佛國到一佛國三昧有所有處令法不斷絕三昧有所在常與佛相遇三昧有坐觀十方大兵大火大水大風於其中不恐怖悉往教導之三昧有所在處但以法作器三昧有善男子善女人聞是三昧即得往來無還之想三

昧如是三昧不可極盡今爲會中粗說之耳有無名三昧有住諸法三昧有名諸慧三昧有教法三昧有滅壞羅漢辟支佛三昧有法寶三昧有總持無無名法三昧有知人意三昧有斷諸煩惱三昧有制力欲覺三昧有滅十方種力三昧有智慧光明所處三昧有不可計三昧有見法時如水影三昧有不可盡淨慧三昧有空諸惡三昧有無願想三昧有住禪乃至泥洹三昧有譬若金剛無穢三昧有極明三昧有過諸煩已盡三昧有廣大水法三昧有莊嚴大船三昧有入無名三昧有不盡喜意三昧有總持無所忘三昧有在冥悉令明三昧有所樂悉樂三昧有慈行三昧有淨大哀三昧有入等心三昧有出等心三昧有名已脫未脫三昧有光明所從來處三

昧有曉無所曉三昧有脫慧脫教三昧有色蓮華爲現三昧有離無常三昧有尊智慧無主三昧有勇猛無所不伏三昧有開闢諸刹三昧有清淨無形三昧有無名寶三昧有如海無所不受三昧有神足廣大三昧有如彈

指無所不及三昧曇摩菩薩語舍利弗言所問慧住故曰不可極是應時聞所聞如意不自貢高所作不忘常敬意如所教習慧用意無所受故不失禮節所作法不忘不亂意如珍寶除諸老病以意爲法器是爲樂忍辱所思但想諦言所樂但法意慧不用足時所施無所惜所與無適莫所聞諦意觀歡喜無所得其意已悅身體爲輕意不在外道但欲聞法味及比羅經但欲聞漚起拘舍羅但欲聞四等心欲聞無底法如意不異念欲意受漚

起拘舍羅欲聞無所從生法不貪觀但欲意受慈度之欲知無常聲欲知寂然之意欲知空復是空欲知無想生死及布施一切不欲聞但欲聞音樂隨樂十方忠信以作正降伏諸欲根曇摩菩薩白佛言菩薩已得寶如來三昧自在所爲衆意已具便得三寶一者譬如水中影影亦不在水中亦不在水外菩薩於是間坐其身悉在十方其身亦不在十方二者菩薩於是間坐分身悉現十方佛前坐其身亦不在十方佛前坐三者譬如山中呼響音聲還報音響亦不在內亦不在外菩薩於是間坐悉遙說十方佛諸菩薩事十方諸菩薩亦無往來到彼者彼亦無往者如是也佛語曇摩菩薩已得陀隣尼門譬如持弓弩布矢在欲所射無所不到菩薩持一慧入萬

億慧靡所不至如是也佛告曇摩菩薩汝見阿須倫欲興兵時彈指之頃兵到六天中間無空缺菩薩已從第九以下欲說法時如是也寶來菩薩語舍利弗言淨者貪欲消伏其意無貪欲者是不可盡其諸惡意者不能伏復亂其意護於惡意是故不可盡其意瞋恚有形欲貢高諸所不可索可欲作菩薩常欲護是意知不可盡去諸垢當知意不可盡護者不令懈怠當知其意不可盡其狂亂者轉以法護之當知意不可極無智慧者欲護之知意不可及一切以法施與法脫之當知意不可盡欲教一切人皆令爲功德當知是意不可盡寶來菩薩語舍利弗言菩薩有四法一者意作陀隣尼行不可盡二者陀隣尼所入行不可盡三者以陀隣尼教一切是不可

盡四者博學問故陀隣尼不可盡是爲四復有四事不可盡一者上脫中脫不可盡二者四馬之路不可盡三者可意之王不可盡四者十二因緣無有主不可盡是爲四復有九法不可盡一者無我之語不可盡二者無作之想不可盡三者寂寞泥洹之語不可盡四者所度不可盡五者大海流水無有懈怠不可盡六者諸惡無垢不可盡七者苦痛之聲不可盡八者去來之想不可盡九者所度無主不可盡是爲九復有九法不可極一者諸佛刹土不可極二者諸菩薩所從來處不可極三者發阿耨多羅三耶三菩提心者不可極四者失願取羅漢辟支佛不可極五者十方菩薩從一佛刹飛到一佛刹不可極六者六波羅蜜不可極七者三三昧不可極八者

過於泥洹亦如化不可極九者三昧不可極是爲九寶來菩薩語舍利弗言菩薩有三十二寶一者其心不著愛欲是即忍辱不可極二者不起我非我亦無所造是故忍辱不可極三者不念一切善惡是爲忍辱不可極四者不恨心意於一切是爲忍辱不可極五者不瞋怒向一切人是爲忍辱不可極六者不懷念他人惡是爲忍辱不可極七者亦不妄燒人有所繫是爲忍辱不可極八者於大會不調戲於座中是爲忍辱不可極九者自護護他人身是爲忍辱不可極十者有貧窮者給與護之從後無所希望是爲忍辱不可極十一者自制不隨惡知識是爲忍辱不可極十二者無有愛欲意於身及他人身是爲忍辱不可極十三者不起諸想無念善惡如彈

指頃是爲忍辱不可極十四者護於功德莊嚴身相是爲忍辱不可極十五者信作善不離於三昧是爲忍辱不可極十六者常護口不妄言是爲忍辱不可極十七者心意清淨是爲忍辱不可極十八者堅住善知識世世與相隨不於他處說其過惡是爲忍辱不可極十九者自較計他人有惡者我亦有惡是爲忍辱不可極二十者所念無有邪邪即覺是爲忍辱不可極二十一者輕心和意是爲忍辱不可極二十二者護惡人令心不起是爲忍辱不可極二十三生天者教導諸天是爲忍辱不可極二十四者生天上世間教兩道中不更三道是爲忍辱不可極二十五者具足諸種好是爲忍辱不可極二十六者得音如梵天聲是爲忍辱不可極二十七

脫婬怒癡是爲忍辱不可極二十八者不於諸色及名有想是爲忍辱不可極二十九者所作功德不著但欲起衆法取是爲忍辱不可極三十者降伏諸外道是爲忍辱不可極三十一者已出諸病中是爲忍辱不可極三十二者具足諸佛法使不傷誤是則爲寶不可極三十二事復次舍利弗復有三十三事爲所入寶一者欲入響欲入觀觀無所觀是即爲寶二者欲入心離心是即爲寶三者於心無主是即爲寶四者欲入身求脫本無脫者是即爲寶五者欲入十二因緣無有住者是即爲寶六者欲入不斷離於不斷是即爲寶七者欲入無常視之無形是即爲寶八者欲入無名主離於無名是即爲寶九者欲入寂不離於起是即爲寶十者欲入三界不離

三界是即爲寶十一者受無所受是即爲寶十二者欲入當來過去亦出當來過去是即爲寶十三者欲入功德觀本無主是即爲寶十四者欲入空空中空是即爲寶十五者欲入無想不起無想是即爲寶十六者欲入願才七離願是即爲寶十七者欲入空離空想是即爲寶十八者欲入三昧無有合所以者何法無二故是即爲寶十九者不以三昧有所願生處是即爲寶二十者三昧不爲一切諸法作證是即爲寶二十一者欲入無生之道無有度者是即爲寶二十二者欲入無生處是即爲寶二十三十三者欲入不動搖處是即爲寶二十四者欲入一切無我不離無我是即爲寶二十五者欲與生死初無相知者是即爲寶二十六者欲與三昧初無相識者是即爲

寶二十七者欲入相初無相知者是即爲寶二十八者欲入欲默欲意是即爲寶二十九者欲入不念無有念是即爲寶三十者欲入陀隣尼門無所不總是即爲寶三十一者欲入者所作惡欲不爲惡是即爲寶三十二者欲入漚沲拘舍羅以意作法器是即爲寶三十三者欲與萬事相應不相遠是即爲寶三十三事佛語文殊師利譬如欲入城當從其門欲知因緣無所諍欲知諍者不如自守欲知不欲語言者不如莫在中不欲動者勿得轉欲無希望者當無所想不欲色者當正住不欲有異者當寂自守能自守者不稱說不自高自下者其人已具足故欲有所便者所作無所失得道亦如是無有疑無有疑者知本無故知本無者無所失故三世等無有異

三世無增減者不住色已不住色爲不住衆法也眼見色者但是眼精住非是色也耳聞聲無所住鼻識香亦無所住口識味亦無所住意亦不知識識亦不知意意無所住如本行無有想慧行諦諦如是無有我是我所諸法見但見無我慧不知所有所有亦不知慧慧不知習習不知慧菩薩心不離心曇摩菩薩白佛言道不與想合者爲有合者無佛言諸法不以想爲證但以音響爲法譬如人吹笛聲音悲快與歌相入音均合同諸三昧者亦如是諸化亦如是念亦如是覺亦如是生死無名離於無名念化覺亦如是諸名無處我不想之無作之想爲離無離無作之作以爲作想想行寂然都無所有諸法非欲一切皆然寶來菩薩白佛言諸寂不起欲決

斷大疑各還本處佛言諸法處無有處化亦
無處念亦無處又問生生處有生生無化化
處有化化無念念處有念念無覺覺處有覺
覺無佛言生生復生泥洹生是爲合怛薩阿
竭意生生復生不生泥洹生是爲不合怛薩

阿竭意化化復化泥洹化是爲合怛薩阿竭
意化化復化不化泥洹化是爲不合怛薩阿

竭意念念復念念泥洹念是爲合怛薩阿竭
念念復念念不念念泥洹念是爲不合怛薩阿竭
意覺覺復覺覺泥洹覺是爲合怛薩阿竭意覺

覺復覺不覺泥洹覺是爲不合怛薩阿竭意

文殊師利菩薩說頌言

法法無有生 合爲一淨耳 生生不復生
泥洹皆如是 化者從本無 化化無脫者
化與泥洹等 寂然無處所 念者本無識

發念因空耳 泥洹與念等 所念諦如是

覺覺平等行 所覺無所到 所覺無常住

是怛薩阿竭 化處無有處 所覺無所到

若化無處所 諸法皆如是 生處有本無

無生是其處 化處無名處 一切爲三昧

念處有念無 從空到其處 非本無所諦

其慧已如是 覺行不相連 覺不離其處

行從覺見識 離覺無有脫 所生法不絕

所在常如是 三千日月中 所明無有上

法者悲思想 所當還行者 於欲不起垢

悲空亦悲想 如來意常淨 亦不處法名

所脫非常住 一切如本處 華香自然來

所出無處所 清淨竟無處 所有皆悉爾

千歲枯樹生 皆從發意起 皆見大光明

世明最無有 虛空無音樂 晝夜光明見

是時大會者 悉發菩薩意 人民大歡喜

皆得聞是經 即動三千刹 得受不動身

寂然法爲見 無名是其應 何況世所有

一切皆如是 清淨不爲定 癡慧本無是

淨癡合同本 慧本無脫者 三昧無所起

一切皆如是 菩薩住道地 在意所從生

五事不可親 令墮三道中 遠離如是行

得佛達十方 百日得法味 奉行是三昧

皆從諸刹來 飛來至佛前 諸天及國王

悉得見佛身 志意大歡喜 身體爲悉輕

不當以色相才七 觀法有三尊十六 般若比羅經

所處無三千 如來本發意 願不離十方

常作大法園 所處無三千 三界之中人

及上忉利天 悉荷陀那佛 其號天中天

發意到其國 須臾復來還 摩提那菩薩

飛還到竹園

佛說無極寶三昧經卷上

音釋

叵普火切 漚不可切 愁寒歌切 拘舍羅梵語也此云方便
翦必列切 苛寒歌切 適莫適都歷切 適莫適都歷切

佛說無極寶三昧經卷下

才八

西晉三藏法師竺法護譯

舍利弗白寶來菩薩言仁所來處刹土何類
本願何如無極國土寶來答曰無極國土爲
何如耶舍利弗言無極國中悉皆菩薩無有
羅漢異種雜人也一切所有皆是七寶寶來
言我發願以來所度不逮不願無極國土所
有也法無起處豈有思想一切刹土有起願
者今復逮是無極想願舍利弗言仁者來時
寶持妙華貴其珍奇不亦想乎答曰是華無
形但以爲主而於竹園以法授之耳又舍利
弗見佛像者爲作禮佛道威神豈在像中雖
不在像中亦不離於像但有想者謂有威神
觀之了無所有也願者譬如忉利天上有華
名拘耆諸天莫不愛樂者菩薩以法爲一切

導眼目道本所有但以意作法器耳舍利弗
言意者獨有主耶寶來曰意者與諸法合諸
法與意合道者無主以無起作主是故爲法
器也又謂舍利弗汝見化未曰見之寶來曰
化道在何所從何所來去至何所舍利弗言
化無處所寶來言何知爲化舍利弗言但見
化成時不見本末故名爲化寶來曰是故無
所有也舍利弗言見者爲倒見乎無所見何
等爲見寶來曰諸想如化是爲見未起法如
化未來法無名是爲見無造法未作法是爲
見無有造化者但作無名之想是爲見怛薩
阿竭作無造之作是爲見舍利弗言於是見
中有往來無寶來言無往來者以故爲見設
有往來者是不爲見是爲倒見也舍利弗問
寶來言乃有斷輪門者無寶來曰薩芸若者

已見無形之門是爲已斷輪門已空可致脫
無脫者可致於空譬如空無所不入何以故
都無有處用是故無所不入用脫於本故其
輪不轉曇摩菩薩語寶來言諸新學者我欲
皆使逮得是法寶來曰欲得空定者當行九
法一者當定十方人悉令作菩薩二者見諸
惡意令心不起是爲定三者視五道勤苦悉
欲脫之是爲定四者於癡徑中不起吾我是
爲定五者視諸不明悉欲令明是爲定六者
所作功德悉令不失是爲定七者視十方人
皆等是爲定八者觀當來過去諸可意生勿
復作識是爲定九者使諸佛刹人悉志菩薩
意不動轉從是疾得三昧是爲定彌勒菩薩
白佛言今在會者誰不發阿耨多羅三藐三
菩提心佛語彌勒昔沙呵樓陀佛時我初發

意爲垢所蓋不得大慧但聞菩薩謂發意當
得其處也但想空不得蓋師不得漚沱拘舍
羅遠離善知識爲欲王所欺音著不斷失波
羅蜜沒六十二劫後與法自然佛會斷我諸
疑逮得本無立於空中諸根即斷見於慧門
得無動之形從是轉行便斷法輪便從正覺
受是三昧雖六十二劫發意於法無益後與
法自然佛會便得大樹乃更發意發意時有
九十億人俱共發心求阿耨多羅三耶三菩
提彌勒菩薩白佛言初發意者有幾法佛言
有九法一者遠離衆會常志寂靜二者得善
知識從受法不失三者遠惡知識不與從事
四者當遠離五事一者惡沙門二者惡婆羅
門三者惡黃門四者惡牛惡馬五者蛇虺毒
蟲此五者不當與從事未得道須令人入泥

犁以故當遠之五者初發意求羅漢辟支佛心者當遠之當覺諸魔事不當與共事也六者但夢中見佛說深法七者但爲法發意不在飲食八者不當數聚會有所希望九者當等心於十方等心於三昧志欲坐佛座不恐怖是爲九法佛說是時六萬愛欲天子皆得是三昧諸天飛在空中悉言善哉善哉得聞是法福德無量彌勒菩薩白佛言是諸天子得聞是法自持功德持佛威神耶佛言是諸天子今聞是者宿命以事二萬佛供養舍利如須彌山雖有是福無益於泥洹今聞是三昧起壞前福所以者何前世所植福皆有生滅今是三昧以空壞有彌勒又言聞是三昧者後得無復壞滅耶佛言是三昧終不可壞所以者何三昧無名處無想處無念處無形

處無識處無威神處無有結行求脫處三昧清淨是不到彼彼不到是無有願想非想處無有造作於化無有形處無生死斷無斷處但有名但有響但有聞慧之處慧無所到無作器是故不可壞不可滅無色處於欲無作識處無起行處不受衆味無有形無出無入無生處無應處寂然無動無邊幅不可壞敗欲敗壞者是大癡根生死之門也又舍利弗有五不直不當與從事一者不當處法有二二者不當於法有所起三者不當現諸法是非無有名者十八四者不當於當來過去有所見五者諸法不可斷是爲五菩薩得是無去來之法者疾得阿耨多羅三耶三菩提須菩提白佛言若有念苦樂者則不離於苦樂是則爲二法菩薩者不中離不上離不脫離不中

無所離於所作遠無作是爲作所起如幻以
幻脫幻幻中無幻幻中無名如是亦不從法
得度亦不離法得度於脫中復脫是爲無有
主但有名耳於字無知名者是爲法輪斷舍
利弗言法輪本清淨無所有誰有斷輪者寶
來曰不知輪有處者是即爲斷佛言貪可法
者是爲生死根滅法亦爲無結之作也無作
之作是爲不離作離貪諸可即爲無有斷者
無貪不起是即道無可不可無生不生無識
不識無死不死無斷不斷無遠不遠諸可不
可所住無想離於無想所念無念所說無所
說泥洹無滅離於無滅泥洹無形離於無形
泥洹滅盡無所盡諸法寂然離於寂然諸法
無可不有所失於慧離本非名無想所明無
所明於明冥無相知者癡慧無相入者於道

才八

五

無有得道者若苦若樂無相識者所起無所
想於清淨無難易所度無有主所至無相離
者諸法非名離於非名所度如流水於名無
轉者如是者皆即道也佛以三昧度如人意
以萬物自莊嚴但莊嚴無形莊嚴倒見莊嚴
諸可意王莊嚴是想非想耳文殊師利菩薩
白佛言此諸天人來在會者有幾所人得是
三昧佛語文殊今是會者諸天及人一切普
悉得是三昧逮是功德悉當作佛當受尊決
斷於五道爾時會者聞佛所語八千億諸天
及人悉得無所從生法忍即昇虛空去地三
百丈其身上各有萬億華香却乃來下稽首
佛足阿樓菩薩呵提菩薩從座起白佛言是
諸上人飛在空中身上華香從何所出佛言
譬如淨帛本自淨潔在所染之五色鮮好帛

本自淨色本亦淨二物因緣故得明好色亦不八帛帛亦不入色以淨因緣而得發明菩薩清淨故致華香其所因緣亦復如是菩薩亦不在華香中華香亦不著菩薩諸天及人得斷念想遠明慧法便有華見用華淨故因緣興耳法亦如是無住者成諸功德住想行者開生死門羅漢辟支佛所以由遠五道者但用十倒見故一者見諸功德悉言脫者悉爲倒見二者見五道勤苦欲取泥洹是爲倒見三者見萬物無常欲疾離之是爲倒見四者求安本自無本是爲倒見五者知出無間八無處世自無出求之不止是爲倒見六者羅漢取泥洹時身中自火出火亦無處便起想出身中火自燒者故知生死不斷是爲倒見七者本末不可盡而自求盡是爲倒見八

十八

六

者欲於泥洹滅盡諸惡不知無主及欲滅之是爲倒見九者所施與不發一切人意但欲法不斷是爲倒見十者於苦於樂不等淨行言有二法是爲倒見行菩薩道當知是事而疾離之佛語阿樓菩薩摩提菩薩等今是諸天及在會人皆是往昔阿呵耨佛時人也今於我前悉剎之者宿命已於六萬佛所受是三昧今故於此而剎之耳却後我法欲斷絕時是等當有四十萬人當持法住今不斷絕然後久久有惡沙門若壞戒人當壞我法須菩提白佛言何所菩薩護法今不斷絕佛語須菩提是四十萬菩薩悉住第八已下於法無煩苛之想是爲護持法今不斷絕也須菩提白佛言何等爲壞法者願佛說之佛告須菩提若有得羅漢辟支佛若沙門及天與人

起想煩苛於法求名壞亂本慧妄增減法枝
掖解說以偽錯真以辯亂道不惟空慧而務
嚴飾聞佛可得志存超獲不知漚沍拘舍羅
而不勤植德行爲是法賊破我道者也阿須
夷天潘那提天提天樓尼天拘屬提天施那
利天俱白佛言願持形壽歸持法者千億萬
劫無休息時常令我等得是三昧佛言其有
德人奉行三昧如法不失則得佛疾其有發
意行是三昧者譬如泥洹天上有寶諸寶中
王天上天下寶中最尊有佛在世寶乃現耳
名曰精摩尼珠有得是珠持著器中若著手
中視之四面空中在欲得幾日兩珠寶所向
莫不如願是尊寶珠不當貪惜當兩三界普
令獲寶是三昧者德亦如是也羅閱祇王白
佛言佛者尊祐世之大道常有大慈救濟十

方願以寶珠雨我國界得令人民普得福利
佛則時笑神光暉暉阿難正服前白佛言佛
不妄笑願聞其意佛語阿難見是王不欲得
泥洹天上寶珠雨羅閱祇使普富饒不知寶
來三昧已得是寶也佛語王言寧見人民百
日不食普得安隱以法爲味又諸女人化爲
男子是法之利不亦大乎王心歡悅即脫珠
寶以散佛上及菩薩上化成華蓋列在空中
其間悉有百千音樂王倍踊躍忘食之想王
白佛言是華蓋者從何而出佛言從無處出
又問無處從何出佛言從無起來又問無所
起從何所來佛言從無所生來又問無所生
從何來佛言從不動來又問不動從何所來
答曰從無造來又問無造從何所來曰從無
名來又問無名從何所來曰從無生來又問

無生從何所來曰從無音來又問無音從何所來曰從無二來又問無二從何所來曰從無形來又問無形從何所來曰從自然來又問自然從何所來曰從化來又問化從何所來曰離於來曰離於化來又問離化從何所來曰離於不化無無相知處來又問無相知處從何所來佛言以是故爲諸法也王聞佛語倍大歡喜白佛言此諸菩薩從遠方來願悉請之明日到宮佛即許之皆受其請王即還宮莊嚴供具夾道施帳幢幡樂麗宮中皆以珍寶作座夫人姝女齋戒盡敬明日文殊及寶來等與諸菩薩俱詣王宮寶來菩薩讓文殊曰今諸上人宜於前入諸菩薩言於慧無處於意無形於念無想於法無所施不離道已斷於法輪於法無念想無多少如是者故爲尊多

入於權於薩芸若無相知者已被法鎧於三昧無增減是則爲尊故宜處前寶來菩薩答曰今諸上人年耆德高以故爲尊宜在前入諸菩薩言我等之年亦如枯樹根本已死無有華葉豈於蔭覆於世爲薄仁者雖幼入慧甚深譬如寶樹益世弘多以故爲尊故宜在前既皆入宮就座而坐諸天在上以樂之王使夫人及諸姝女燒衆名香進奉供具飯食畢訖王問寶來我今欲得見十方佛我當行何法而得見之寶來曰欲見諸佛當行九法一者視十方佛與是無異二者當視道無有徑三者視一切無有脫者四者當視飯食如化所見五者當知五陰無有識想六者當知六情觀之如幻七者當知所觀但是倒見八者於法中大施與九者當知所施無所施是

爲九也空其意等所視無彼此志寂然得淨
定無所見則普見佛爾時讚寶來曰快哉快
哉審如所說佛說頌曰

常當願是劫	所生常遇尊	從受大智慧
常除愛欲根	不貪亦不疾	惡意不復生
乃於無數佛	得聞是三昧	入於三千刹
當行尊三昧	不於一切人	所有諸珍寶
法不從五陰	亦不離其處	從觀得脫名
一切皆如是	從觀得歡喜	發意無所至
其處已如是	是爲天中天	若在三界中
不生亦不死	泥洹及泥曰	一切無有是
意不當邪念	所行作非法	若在三界中
持心令不起	音響有還答	內外悉相應
不起悉寂然	諸法亦如是	三千諸佛刹
名字悉如是	無聞亦無見	非法所當議

三昧不校計	以數持作多	慧者解是言
得佛無常處	法者悉清淨	曠大無有雙
常作無邊水	所載蔽三千	意願陀隣尼
發意無有前	法者已如是	一切常奉行
我念求法時	從來若干劫	志意常棄家
於欲無所求	常依善知識	得立正法住
是時於大會	得聞尊三昧	志意大歡喜
即住虛空中	去地百四十丈	叉手在佛前
令坐諸菩薩	受剎亦如是	其意增歡喜
得聞諸三昧	便從一佛刹	飛到諸佛前
不動亦不搖	震動諸刹中	龍王大歡喜
即雨萬種香	化爲諸水池	上到三千中
華香自然來	亂風自然生	百種諸音樂
悉住於空中		

於是寶來菩薩問文殊師利言今此香華從

他刹來及諸音樂來在會中爲佛威神將菩薩力耶文殊答曰佛及菩薩得力神變皆不可見知是樂者無名之樂有所在處法音無名處若樂是樂處所有如化是樂無二法是樂於羅漢辟支佛悉欲受之是樂所見異道悉欲令得佛是樂所度無有主是樂一切處無處所無起於三昧無煩苛是樂一切處無有名是樂諸所有皆如化是樂非音處無所生處是樂法所施無所施是樂大千刹中無常處是即樂一切人令得信無所得是其樂當來過去現在三處盡無所盡是樂令還本無所見是樂見法輪是爲無所見是樂三千刹中一切等是樂十方三千樹法之藏是樂十方刹但有名是樂色欲合是樂於名字無有主是樂無邊幅一切寂是樂一切明與冥

十八

十一

合是樂諸所行不失戒是樂諸所合不離三昧是樂虛空寶度無極是樂諸慧覺無有處是樂諸所可是樂一切決無受者是樂三界中無與等是樂貪於法不惜命是樂一切明令復明是樂諸所有但倒見見正者是樂布施無所希望是樂意無極作大船師是樂無邊園脫無極是樂意寂靜是樂無所定是樂諸三昧門無倒者是樂亦無聽亦無聞是樂諸所念非正意是樂一切人無脫者是樂諸所度譬若幻是樂初發意三昧俱是樂諸菩薩所從來無有處是樂諸菩薩在意生到十方是樂非青黃白黑無道徑是樂如是寶來欲知佛及菩薩威神音樂所樂如是寶來菩薩說頌言

文殊師利意 慧尊無有前 所施蔽三千

其智莫不尊 威神所施行 悉除三千中
諸樂無所欲 但爲不脫施 法樂爲最大
於化無度者 所施樂法與 若空無度者
法與樂俱行 無有過是寶 所樂不有主
若空無處所 深入諸微妙 曉了一切人
使之得大法 斷滅勤苦根 一切世間人
悉有意不解 以法爲覺意 以慧救一切
佛爾時遙爲寶來菩薩說頌曰
離空非想是想非空於法不起即爲是起
常當輕意淨無所有色欲同合無相入者
所說無形不離有形同法如夢所可無底
是寂離寂無離不造衆法無主所可如化
都無所受法無所捨所作倒見一切皆然
非色離色是色不離其法如色其處如是
非音是響無聞不見不聽不觀所有如是

十八

十二

於化無名自言爲是法無是計所度如是
於幻無見所見離見離貪諸欲非法所儀
於欲無垢不著無離如是諦見無有見者
於淨離淨十方無造所可若寶如化無主
寶來菩薩知佛所說便於宮中說頌曰

疑本不解謂法皆然本無常住疑慧如是
於想無勞識念無苦舉名住字非求法者
於本不爾不還不是所可無可遠離無可
脫生無滅是即爲滅於滅無想是爲非滅
於法無生亦不想成所以者何諸法皆空
亦不求言我離泥洹所以者何本末淨故
不盡十方舉之爲證有言是我是即爲證
不當遠念念於十方法無二法即得無名
法非思想可當逮者起行如是不見尊法
要當解慧於妙不恐染行不生可謂慧門

寶來菩薩問文殊師利今在會中新發意者
我欲使得無極法當何以致之文殊答曰於
想無作即得無極法又問何謂無想作者文
殊言當逮九法寶一者意無處所是即寶二
者觀法無主是即寶三者不見有當來過去
是即寶四者於法無有造作者是即寶五者
所施但施經法是即寶六者見五道勤苦於
其中不轉是即寶七者所覺不遠漚沍拘舍
羅是即寶八者直見諸法不處法有二是即
寶九者到於泥洹亦如化是即寶是爲九法
寶於是文殊師利說偈曰

於可無所欲 所住無常名 若空無有垢
佛笑無不可 笑空不離末 如本無笑者
已住諸法名 一切皆如笑 法者皆是一
已笑便有二 於二無名字 是故爲是尊

所笑無所著 但爲衆法施 所動無所動
是故無上尊 笑者無還報 一切無有主
其笑不離本 是故天中天 笑者無所起
但爲倒見耳 於法悉寂然 寂者本無故
笑者不離化 以化大施與 於化無舉名
是故乃爲法 於法無有是 但爲不脫施
所脫不爲脫 佛者亦如是 故於大會中
議度無度者 於法作施與 無有與比者
舍利弗問寶來曰欲使十方一切學者皆得
總持諸陀鄰尼修行何法當得致之寶來曰
當行三十二法寶一者欲使一切未發意者
皆當度之如化無礙二者未發無上正眞道
意者皆令住正法三者視三千大千刹土等
無異四者若住限者令遠離衆欲在於慧門
無動無轉得至泥洹五者人說有天無天志

不動還六者志道堅固意不怯弱七者一切
無來受生者視當來過去無有二八者觀諸
三昧禪寂然無處所九者諸所度無有主一
切從空致空十者三千大千諸佛我悉從受
法十一者他方刹土敢有來聽經者悉令得
決十二者諸佛刹土所有華香來者亦不喜
不來者亦不求十三者諸發意者使得法住
十四者當來過去意無增減所以者何知本
無二故十五者悉欲令十方蜎飛蠕動奉持
禁戒終無毀犯十六者無有邪念在於十方
轉意還本則向慧門十七者無所不忍常無
恥恨十八者從觀至觀無有度者十九者如
本無住無常住處二十者所度無有主如空
無念想二十一者於慧作施與無有舉名者
於欲無所著便從是得脫二十二者所說不

離對因作施與故於大國眾中度無脫者二
十三者於無數刹飛到他刹在諸佛前無所
罣礙二十四者視諸刹等無得脫者二十五
者淨癡同合本淨無異二十六者住大千中
主作橋梁勸進未覺令冥見明二十七者於
大海中作大船師度諸羣生無有厭極二十
八者作無邊蓋閉塞眾垢二十九者作無極
慧不離十方三十者作大慈哀包潤一切諸
未度者悉當度之故號之曰天中之天三十
一者常行等心無有偏適救濟無雙故號無
上尊祐三十二者菩薩所說不離經法遍大
千刹中莫不等聞是故空中自然生華是爲
菩薩三十二法寶於是寶來菩薩說頌曰
十方普如化 一切皆無常 眞法正諦寂
演說度衆生 有想不離想 一切寶本空

若華未施業	其色不可當	一切所眾欲
立之可意王	諸寶無上尊	號為天中天
故於大會中	議度無脫者	其本無常住
故字十力尊	一切為倒見	世間謂之冥
所可若能化	能脫十方中	虛空無常處
佛藏悉在中	以脫無脫者	故教十方人
十方諸佛刹	合之為一國	自然眾大會
悉滿十方中	佛者一切覺	笑不離其容
不離黃金色	以示未脫人	十方為作導
意不離法王	所施無所施	華布於十方
金色大蓮華	遍滿諸空中	起想而作行
不住諸天中	文殊師利意	曠大無有雙
使得道別者	住在虛空中	寶來慧意尊
光明遍宮中	可意諸天人	悉得到法門
十方諸菩薩	感動諸刹中	今會諸天子

得聞是尊經 徹見諸一切 乃到可意宮
化為交露座 萬種天華香 聽受諸三昧
坐觀大眾中 諸來宿功德 發意供養尊
尊者不見有 所有皆如是 諸脫無有數
三界不可極

文殊師利菩薩問寶來曰眾音如化所作法
無想亦不可盡故有自然當以何脫之寶來
答曰有九法寶一者自然無處亦如化二者
諸法無處亦如化三者當來無處亦如化四
者諸所有世處亦如化五者觀過去處亦如
化六者觀見諸法如幻耳亦無有處亦如化
七者所可無處亦如化八者得道無脫處亦
如化九者得於泥洹本無住處亦如化是為
九法可得脫慧文殊又問過於泥洹皆亦自
然誰為是化本者誰是化主者化為有本無

化有所起處無道爲有處無寶來答曰有九
法知化無處一者非道無處是則化二者化
非處無想是則化三者化者無起化處無處
是則化四者常名所有無盡時是則化五者
化處無處是則化六者於道無想是則化七
者化者於起無起是則化八者化者於諸欲
無有處是則化九者化者於所度無所處是
則化是爲九法知化本於是文殊師利又說
頌答曰

十方無化者 化化無有形 一切無常寶
是故爲化主 道者不化得 亦不離其處
所說無常形 自然在其處 諸寶從化得
本離從無有 其本因化生 是故人中尊
欲者從化起 法本無有是 化而住五道
無有見化主 生死及五道 與化不相連

才八

十七

以世貪不斷 故現正覺耳 如來及化生
十方尊無極 持化大其世 世間無知者
法輪無色轉 於化無轉者 繫色有思想
深法無轉者 想色化十方 莫不受法者
所施大智慧 世間無說者 諸欲及羅漢
不逮覺是寶 故於衆會中 廣說無二寶
智慧不可極 光明最無有 十方作橋梁
所說無有二 十方諸佛刹 悉令爲平等
亦不使其人 發意有異心 十方諸法園
一切法度垢 亦不從世間 於法無脫者
於慧無有脫 不見往來者 於寂復見寂
明中復見明 法者悲慧得 自然本無是
慧冥俱同合 故無相識者 癡慧不同合
其慧衆冥明 所施但爲法 如華在高山
諸惡不可極 色欲不可盡 泥洹及生死

一切皆如是 十方諸佛慧 無知無覺者
所以見淨法 故言世無有

曇摩菩薩復問寶來菩薩言於化無起離誰
爲成主者泥洹不生滅不遠五道當來發意
轉住法轉淨無諸垢一切衆生誰爲度者寶
來答曰快哉所問欲決一切生死之根乃如
是乎菩薩有九法寶一者於化化生無主二
者於泥洹與生死初無相知者三者於生死
於滅無滅四者一切天上使不還生無生處
五者當起意未起意如處住六者三千大千
佛刹觀了無得度者七者於念無起處八者
悉使三千佛刹皆取泥洹意亦不喜不取泥
洹意亦不瞋所以者何諸法無處故九者隨
願取羅漢我悉令發意若有發意求願者不
令復還不起諸生無有還願是爲九法又說

十八

十八

偈言

於可無不可	於欲無所欲	所度無見者
法輪無常處	慧者無所說	因度無往者
故見大正法	世之最無有	道者無常名
故爲十方寶	以得無得者	生死無有道
四馬不可盡	可意無有足	世間悉樂之
不捨不得道	畏生無有脫	不畏無脫者
生死當舉名	立之爲五道	有報無答者
可謂爲是法	法者本無二	所有諦以覺
無邊亦無幅	無極不可計	本際如影響
無有往來者	於起無所起	法無諸欲者
生死本無處	生死化如是	於淨無有淨
於垢無有垢	悉爲十方人	斷絕諸五道
淨意若如水	一切無瑕垢	青黃及白黑
悉得見其形	諸法不可呵	即得無上寶

吾我及與人 世間無得者 不住無住諦
所有諦如是 所覺無所見 世間諦如是
不度無不度 世時誰不有 十方立正覺
悉得無上寶

曇摩菩薩問寶來菩薩言欲使十方諸天人

民自然皆令得如其處當得何等法得致之

乎寶來答曰有六事得逮是法一者聞如是

會時是即為寶二者得聞是經是即為寶三

者還本功德是即為寶四者得聞是經法者

悉得六萬三昧是即為寶五者已得六萬三

昧欲十方人發無上意是即為寶六者皆使

十方悉得會於佛樹是即為寶說是經時九

十億菩薩六十七億諸天人民皆得無所從

生法處九億菩薩得是三昧三千大千佛刹

六反震動諸天於空中大作妓樂諸龍阿須

倫皆得聞見是深三昧阿難正衣服長跪白
佛言是名何經云何奉持佛語阿難是名為
無極寶當奉持之佛說經已諸天人阿須倫
人非人皆歡喜各前為佛作禮而去
佛說無極寶三昧經卷下

音釋

虺許偉切 虺也 似蛇而小 瞞瞞于鬼切 瞞弋輒鎧切 瞞瞞光明威貌
甲可亥切 甲也 輒乳兗切 柔也